



জানুয়ারি ১০, ২০০৭, বুধবার : পৌষ ২৭, ১৪১৩

রাজধানীর ৫ ওসির সঙ্গে মির্জা আব্বাসের বৈঠক মহাজোট নেতাকর্মীদের দমন-পীড়নের নির্দেশ

কাগজ প্রতিবেদক : রাজধানী ৫ থানার ওসিদের নিয়ে দীর্ঘ গোপন বৈঠক করেছেন বিএনপি নেতা মির্জা আব্বাস। শাহাজাহানপুরের বাসায় খিলগাঁও, সবুজবাগ, মতিঝিল, পল্টন ও রমনা থানার ওসিদের নিয়ে এ গোপন বৈঠক করা হয়। বৈঠকে মির্জা আব্বাস তার নির্বাচনী এলাকার মহাজোটের নেতাকর্মীদের একটি তালিকা পুলিশের হাতে তুলে দেন। ঐ তালিকা অনুযায়ী গ্রেপ্তার ও বিভিন্ন মামলায় জড়ানোর নির্দেশ দেওয়া হয় ওসিদের। দীর্ঘ সময় বৈঠকের এক পর্যায়ে বিভিন্ন সংস্থা ও মিডিয়ার লোকজন খবর পেয়ে গেলে ওসিরা পালিয়ে যান।

সূত্র জানায়, ঢাকা মহানগর পুলিশ কমিশনার ফজলুর রহমানের নির্দেশে বিভিন্ন সময় ঐ ৫ থানার ভারপ্রাপ্ত কর্মকর্তারা এর আগেও একাধিকবার বৈঠক করেছেন মির্জা আব্বাসের সঙ্গে। তত্ত্বাবধায়ক সরকারের আমলে থানার ভারপ্রাপ্ত কর্মকর্তাদের এ ধরনের বৈঠক নজিরবিহীন। প্রভাবশালী বিএনপি নেতার আনুগত্য প্রকাশ করার নামে মহাজোটের নেতাকর্মীদের ওপর যে নির্যাতন, মামলা ও গ্রেপ্তার অভিযান চালানো হয়েছে তা রাজধানীর অন্য কোনো থানা এলাকায় দেখা যায়নি। গতকাল রাতে প্রায় সাড়ে ৩ ঘণ্টা গোপন বৈঠক চলে। বৈঠকে পল্টন, মতিঝিল, রমনা, খিলগাঁও ও সবুজবাগ থানার ওসিদের আরো কঠোর হস্তে মহাজোটের নেতাকর্মীদের দমনের নির্দেশ দেওয়া হয়। রাতেই মিটিং শেষে এই ৫ থানার ওসি থানার এসআইদের গ্রেপ্তার অভিযান জোরদার করার নির্দেশ দেন। মতিঝিল, পল্টন ও খিলগাঁও থানার বেশ কয়েকজন এসআইর সঙ্গে কথা বলে জানা গেছে বৈঠক শেষে প্রত্যেক ওসি একটি করে তালিকা নিয়ে থানায় ফিরেছেন। ঐ তালিকা সম্পর্কে তারা কিছু জানতে পারেননি। বৈঠক যোগদানকারী ওসিরা হলেন খিলগাঁও থানার ওসি র"হুল আমিন, সবুজবাগ থানার ওসি মোহাম্মদ মোজাম্মেল, মতিঝিল থানার ওসি আয়নুল হক, পল্টন থানার ওসি মোহাম্মদ মাহফুজুল আলিম ও রমনা থানার ওসি হামিদুর রশিদ।

This page has been printed from the web site of The Daily Bhorer Kagoj (www.bhorerkagoj.net).

URL: <http://www.bhorerkagoj.net/news.php?id=33930&sys=3>

Developed by: Colors of Bangladesh (www.colorsofbangladesh.com)